

Analista Norberto Tjon Ajong ta ilustra motibo

Dollar no ta opcion pa Aruba; su existencia ta debil

ORANJESTAD—No tur analista ta di acuerdo cu e proposicion pa introduci dollar como vehiculo di pago na Aruba. Norberto Tjon AJong, reportero investigativo y operado di globalnewsaruba.com ta totalmente contra ponencianan di ex Presidente di Banco Central di Aruba Rob Henriquez, kende a sugeri cu dollarisacion na Aruba lo por ta un solucion pa e falta di disciplina financiero aki. Den concepto di Tjon Ajong, e cambio di Florin pa Dollar lo ta e eror mas grandi. Economistanan rond mundo a adverti cu dollar ta den un estado critico. E ta den un situacion asina fragil cu Banconan Central rond mundo ta cambiando nan dollar den oro of silver. Mas ainda, OPEC ta deliberando caba cu China pa for di e aña aki caba, cambia e balor di cambio pa petroleo di dollar pa Yuan (e moneda) Chines. Pais Merca ta practicamente bancarota, y e dollar no tin balor mas, Tjon Ajong a bisa. E ta bisto na momento cu mester haci intercambionan comercial cu Venezuela. E crisis di e dollar Mericano tin como 10 aña caba andando, Norberto Tjon Ajong ta splica. Merca ya no ta un productor industrial, sino mescos cu Aruba tin un economia cu ta basa riba servicio, unda no ta produci, pero ta rebende producto y servicio for di exterior. No tin un solucion na horizonte pa e deficit Mericano, cu ta core den triyones di dollar. E condicion di guerra cu Merca ta den constante no ta yuda, y ta nifica cu e conflictonan den Medio Oriente simplemente ta haci e dollar mas debil ainda. Diferente estado Mericano mes ta cuminza move for di influencia di e Banco Central Mericano, Federal Reserve Bank, y a cuminza cu nan propio banconan cu ta propiedad di estado, pafo di influencia di Washington. Tjon Ajong ta kere cu si Islanan BES y Corsow kier move den economia di Dollar Mericano esey ta un asunto di nan. Den su concepto, Aruba por keda cu su propio sistema monetario y sigui cu comercio pa medio di intercambio di divisas. Norberto Tjon Ajong riba su website a bisa cu locual mester puntra si nos capacidad pa maneha nos economia manera mester debe ser, ta keda delicado. “Nos mundo ta den un situacion economico asina fragil cu un solo fout economico lo costa

hopi y no lo por keda resolvi den un tempo cortico. Tampoco por conta riba ayudo financiero di paisnan industrial manera antes.” Den su concepto ya caba paisnan den tercer mundo (paisnan

den desaroyo) ta trahando riba nan independencia economico financiero. Esaki ta encera cu corrupcion gubernamental den e paisnan aki lo mester desaparece, y lo no por sobreviví, ya cu placa

den caha di Gobierno ta yegando su fin. Lo no tin fuentenan disponibel mas pa yega e cahanan aki cu credito manera tabata e caso añanan prome. Den e sentido aki, Tjon Ajong

y Henriquez ta comparti e mesun pensamento, esta cu na final ta Gobierno mester asumi responsabilidad financiero y ta prepara pa enfrenta realidadnan economico difícil nos dilanti.